

INFORMACIJA O STANJU POPLAVA NA PODRUČJU OPĆINE I PROVOĐENJU MJERA ZAŠTITE OD POPLAVA

U toku protekla 24 sata zabilježene su nove obilne kišne padavine na području općine Tešanj (76 l/m^2), koje su uslovile povećanje svih vodotoka, a naročito rijeke Tešanjke i Radušice, kao i povećanje nivoa površinskih voda i potoka. Usljed nastale situacije, tokom proteklog dana i noći intenzivno su provođene mjere zaštite od poplava na području Kaloševića, Rosulja, Bukve, Medakova, Novog Sela, Dobropolja, Šija, Piljužića, Jelah polja, Tugovića i gradskog područja.

U MZ Kalošević tokom dana postavljen je nasip u cilju sprečavanja izlivanja rijeke Usore i plavljenja objekata na kojem su tokom noći dodatno provođene mjere odbrane od poplava. U ovom području je ugrožen bio jedan stambeni objekat.

Mjere odbrane od poplava su provođene i u MZ Rosulje gdje je prijetilo izlivanje rijeke Radušice u donjem toku kod mosta na magistralnom putu M-4. Postavljen je nasip u cilju zaštite objekata i saobraćajnica.

Također, zabilježeno je izlivanje rijeke Usore u Kraševu gdje su dva objekta bila ugrožena, od kojih je jedan preventivno iseljen.

Nešto iza 24:00 sata sinoć u kratkom periodu, u dva navrata je došlo do obilnih kišnih padavina lokalnog karaktera, što je dovelo do naglog porasta površinskih voda i potoka, te uslovalo plavljenje privrednih objekata u industrijskoj zoni Bukva, stambenih objekata u mjestima Šije i Dobropolje i dijela saobraćajnica Tešanj-Tešanjka u naseljenim mjestima Bukva, Medakovo i Novo Selo i dijela regionalnog puta u naseljenom mjestu Dobropolje i Tešanj. Na navedenim područjima ugroženo je bilo više stambenih objekata. Ugrožen je bio i objekat Osnovne škole "Huso Hodžić" u Tešnju.

Snage i sredstva civilne zaštite tokom proteklog dana, a naročito noći, intenzivno su bile angažovane na provođenju mjera odbrane od poplava, raščišćavanju saobraćajnica i pružanju pomoći ugroženom stanovništvu i privrednim subjektima.

Tokom noći vršeno je plansko isključenje potrošača električnom energijom pojedinih područja i objekata u cilju adekvatnog provođenja mjera zaštite od poplava. Jutros se vrši uredno snabdjevanje električnom energijom potrošača.

Jutros je došlo do značajnijeg pada vodostaja rijeka Usore, Tešanjke i Radušice, kao i površinskih voda i potoka. Vodostaj Usore na mjernom mjestu u Kaloševiću jutros u 07,00 sati iznosio je 200 cm.

Općinski štab civilne zaštite jutros je održao vanrednu sjednicu na kojoj je analizirao situaciju, prema operativnim podacima i uvidom na terenu, o preduzetim mjerama tokom proteklog dana i noći. Utvrđene su dodatne mjere djelovanja na poplavljenim područjima. Općinski štab civilne zaštite putem nadležnih službi će nastaviti redovno pratiti stanje vodotoka na području općine i informisati stanovništvo.

Zbog pojave različitih informacija na portalima i forumima vezano za stanje poplava na području općine u proteklih 48 sati, Općinski štab civilne zaštite će i dalje nastaviti sa izdavanjem saopštenja i informacija u cilju objektivnog informisanja i pružanja validnih informacija građanima o stanju na ugroženom području.

OPĆINSKI ŠTAB CIVILNE ZAŠTITE TEŠANJ